

Sura ya 3 – Wafungwa katika Nchi ya Ahadi

Agano la Kale lilitolewa kwetu kama kielelezo na onyo ili tujifunze kwalo. Tunasoma katika 1 Kor 10:11 kwamba “Basi mambo hayo yaliwapata wao kwa jinsi ya mifano, yakaandikwa ili kutuonya sisi, tuliofikiliwa na miisho ya zamani.”

Nchi ya Ahadi katika Agano la Kale ilikuwa nchi ya Kanaani. Nchi hiyo haikuwa kamili; maadui wa wana wa Israeli walikaa katika nchi hiyo, yenye vita na mapambano. Nchi yetu ya Ahadi siyo mbinguni, ni hapa hapa na tena wakati huu huu tunarithi ahadi za Mungu katika maisha yetu kama wakristo. Maadui zetu bado wapo hapa na wanaweza kutufanya wafungwa, hata katika nchi yetu ya ahadi! Usifikiri kwamba eti kwa sababu sisi ni wakristo hatuwezi kudhurika na vifungo vya Shetani.

Katika Agano la Kale Wana wa Israeli walikuwa wafungwa katika Nchi yao ya Ahadi. Wakristo wanaweza pia kuwa wafungwa, na wengine tayari wamefungwa na Shetani lakini hawajui jambo hilo.

Onyo! Jambo hili ni la kisirisiri. Linaweza kuwa hatari kwa afya yako! Kwa kuwa Shetani hakuweza tena kuwafanya watu wa Mungu wakae katika njaa, alijaribu kuwafanya watumwa katika nchi ya Misri. Alijaribu tena kuwaangamiza jangwani walipokuwa safarini kuelekea Nchi ya Ahadi, lakini hakuweza kuwazuia katika mto Yordani wala Yeriko. Lakini walipofika katika Nchi ya Ahadi, aliwapata katika mji mdogo uitwao Ai. Kwa nini? Kwa sababu ya dhambi zao wenyewe. Dhambi zikawa **adui wa ndani**, sio nguvu za kijeshi zinazoonekana (Yoshua 7).

Kwa mamia ya miaka, wana wa Israeli walimlilia Mungu na akawaokoa kutoka katika mateso yao. Baadaye wakaanza tena kuabudu sanamu na kuwa wafungwa katika jambo jingine. Kwa nini?

“Kisha niliwaambia, Mimi ndimi BWANA, Mungu wenu; msiiche miungu ya Waamori, ambayo mwaketi katika nchi yao; **lakini hamkuitii sauti yangu(Neno)**” (Waamuzi 6:10).

Katika Waamuzi sura ya 6 Mungu alimwendea Gideoni katika hali aliyokuwa nayo. Waebrania walikuwa katika Nchi yao ya Ahadi, lakini kila walipopanda mbegu, Wamidiani na Waamaleki waliyavamia mashamba yao na kuyaharibu mazao. Wakaiba mbegu kama jinsi Shetani anavyoiba mbegu ya Neno la Mungu. Kwa hiyo hawa watoto wa Mungu walikuwa kwa hakika wamefungwa na adui yao, ingawa walikuwa katika Nchi ya Ahadi.

**Agano la Kale linaonyesha jinsi watu wa Mungu walivyoishi
kama wafungwa katika nchi ya ahadi.**

Ha! Ingawa ni Wakristo,
ninaweza kuwafanya
wafungwa



Hivi ndivyo adui anavyofanya ili kukunasa. Hutafuta yale matendo ya mwili wako (utu wako wa kale) ambayo hutayaacha.

Atakushawishi kwamba huna haja ya kuishi kwa kulifuata Neno la Mungu, eti unaweza kuishi unavyotaka mwenyewe. **Atakushawishi kwamba huna haja ya kuufuata ufalme wa Mungu na utaratibu wake wa kuzaa matunda.**

Baada ya muda huyang'ang'ania yale matendo ya mwili na hatimaye unajikuta umedanganywa na pepo hili. Haina maana kwamba utakuwa umepagawa na pepo, la hashu, bali utakuwa umeathiriwa na pepo. Mambo haya huwa ngome na kukufanya ujisikie huna matumaini. Wewe ni Mkristo katika nchi ya Mungu ya ahadi, hata hivyo umefungwa kama wale watu wa Agano la Kale. Wewe si mteule tena unayetoa maji yatiririkayo ili kuwasaidia wengine. Shetani ameusimamisha mto kwa kuwa umempa nafasi.

Shetani anaweza kutuweka katika vifungo gani?

“Yesu akawajibu, Amin, amin, nawaambia, Kila atendaye dhambi ni mtumwa wa dhambi” (Yohana 8:34).

Magonjwa, maradhi

Ukosefu wa fedha

Kutokupendwa. Kama hatupati upendo usio na masharti kutoka kwa wazazi wetu, tuko kifungoni.

Ubinafsi, au kujipenda mwenyewe ni kinyume cha upendo wa kweli. Huku ni kufikiri kwamba wewe ni kitovu cha dunia na kwamba vitu vyote vinakuzunguka.

Kujidharau – hali ya kujiona hufai, umeshindwa. Hatupaswi kusikia jinsi tulivyo kutoka mahali pengine au kwa mtu yeyote isipokuwa Mungu na Neno lake. Mwili na Ulimwengu vinajaribu kutuweka hali isiyo ya kweli kuhusu jinsi tulivyo. Ama tunajiona wakubwa sana na kujivuna, au tunajiona hatufai, tumejaa aibu na unyonge. Njia nzuri ya

kushinda jambo hili ni kujua kwamba Mungu anaishi ndani yako, na kwamba kila uendako umebarikiwa kwa sababu unatembea pamoja na Mungu. Kila unayekutana naye amebarikiwa na wewe kwa sababu wewe ni chombo cha udongo kilichojazwa utukufu wa Mungu. Hata kama wengine wanakuona tofauti, wewe endelea tu kujiona umebarikiwa. Kazi yako au biashara yako haikutambulishi jinsi ulivyo. Unapokwenda kazini kwako, unaipa heshima kazi hiyo. Yesu alipowatawadha miguu wanafunzi wake, ilikuwa kama kusafisha choo, lakini kwa kuwa Mungu ndiye aliyefanya hivyo, kutawadha miguu limekuwa jambo la heshima.

Wajane na Yatima. Yakobo 1:27. Mungu ameweka mkazo maalum kuhusu hali ya wajane (neni hili linajumuisha pia watu waliopewa talaka) na yatima (neni hili linajumuisha pia watoto wa mtu aliyepewa talaka). Hali hii inahusu kukosa kuwa na mamlaka, mtu wa kukufunika na kumkosa baba. Linahusu pia hali ya kuachwa bila ulinzi au mtu wa kukutetea. Agano la kale limejaa maonyo kwa Wana wa Israeli wawatuze wasio na baba na kuwajali wajane. Kanisa la leo linapaswa kufanya vivyo hivyo.

Wote tunahitaji usalama, hivyo mtu anapokuwa mjane au yatima anakuwa amekosa sana usalama. Nawafahamu watu waliopata shida sana baada ya kuwa wajane au yatima. Iliwachukua muda mrefu kuweza kuikabili hali hiyo. Sisi kama waamini, tunapaswa kuuwakilisha moyo wa Mungu kwa wajane na yatima. Moyo wake unawatafuta ili kuwapa faraja maalum na kuwapa mahitaji yao. Yeye ndiye anayewafunika, yeye ndiye usalama wao. Kama umewahi kuwa "mfungwa" wa aina hii, unahitaji kujua kwamba Mungu anasema katika Yakobo 1:27 kwamba ibada ya kweli, "dini" ya kweli na kumcha Mungu ni lazima viambatane na kuonyesha moyo wake wa upendo unaojali wajane na yatima. Hii ni kauli muhimu sana ya Mungu, hivyo unahitaji kujua jinsi anavyopendezwa na wewe na jinsi anavyokujali! "Baba wa yatima na mwamuzi wa wajane, Mungu katika kao lake takatifu." (Zaburi 68:5).

Ukwasi – Kuutumainia ulimwengu ukupatie vitu unavyovihitaji katika maisha, badala ya kumtumaini Mungu.

Kudhalilishwa – Watu wengi sana wamedhalilishwa kijinsia na kwa namna nyingine.

Kujihesabia haki ni kifungo kikubwa sana. Hii ni hali ya kujiona bora kuliko watu wengine kutokana na jinsi unavyofanya mambo kwa nguvu zako mwenyewe.

Maadui wengine ni kutokusamehe, hatia, kwenda kinyume na maadili, zinaa, uchungu, umbeya, hasira, kukosa kuwa mwaminifu na mkweli.

Ulevi – kuna ulevi wa aina nyingi, lakini kwa ujumla ni kutawaliwa na tabia au mambo mabaya badala ya upendo wa Mungu kwa njia ya Roho Mtakatifu.

Wengi wamenaswa katika laana za vizazi kama vile kushindwa kuonyesha upendo na huruma, kukaa katika hali ya utumwa, kuwa mtu anayetafuta tu kuwapendeza watu, kuwa mtu asiyeridhika na chochote au anayetaka kufanya onyesho kwa lengo la kujitukuza. Maeneo mengi katika hayo hujidhihirisha katika mahusiano yaliyoharibika, kutoweza kuishi kwa amani, kutoweza kuridhika.

Uchawi au kuwatawala wengine. Unaweza kuwa mwathiriwa au mkosaji.

**Hata hivyo ninaamini kwamba mojawapo ya masuala
yaliyoenea sana ni KUKATALIWA**

Ninaamini kwamba kukataliwa ni mzizi wa mamia ya matatizo mengine. Tunahitaji kukubaliwa na wazazi wetu bila masharti yoyote tunapokuwa wadogo. Tunahitaji kukubaliwa na wenzetu, wenzi wa ndoa nk. Katika jamii ya leo, watu walioharibika husababisha pia uharibifu kwa wengine kwa njia ya kuwakataa na hii huenea kutoka kizazi hadi kizazi. Hatuwezi kuonyesha upendo kwa wengine bila kuupokea kwanza upendo huo. Neno la Mungu katika 1 Yoh 4:19 linasema hivi: “Sisi twapenda kwa maana yeye alitupenda sisi kwanza.” Dawa ya Mungu ya kutibu hali ya kukataliwa ina sehemu mbili

1) Alichukua kukataliwa kwetu na kuibeba hali hiyo kwa ajili yetu. Biblia inasema katika Isaya 53:3 kwamba, “Alidharauliwa na kukataliwa na watu; Mtu wa huzuni nyingi, ajuaye sikitiko; Na kama mtu ambaye watu humficha nyuso zao, Alidharauliwa wala hatukumhesabu kuwa kitu.”

2) Anatukubali bila masharti kwa upendo wake mkuu! Katika Waefeso 1:6 tunasoma maneno yafuatayo, “Na usifiwe utukufu wa neema yake, ambayo ametuneemesha (ametukubali) katika huyo Mpendwa.”

Yesu hatuhukumu katika maeneo haya. Yesu anataka kutuweka huru. Hii ndio misheni yake. Lakini sisi wenyewe tunahitaji kuwa waaminifu, tutupe mbali kiburi chetu na kuwa tayari kushiriki hatua za uponyaji utakaotuweka huru.

Gideoni ni mfano wetu wa mfungwa aliyewekwa huru, na yeye akawaweka huru watu wake! Gideoni alizaa matunda kwa ajili Mungu.

Fuata njia ya Gideoni – Waamuzi sura ya 6

• - 6:1 **Aliathiriwa na tabia ya baba zake ya kuabudu sanamu.** Watu wake walikuwa katika kifungo cha umaskini kwa muda wa miaka 200 ya kuabudu sanamu. Kitu cha kwanza tunachohitaji kufanya ni kuwasamehe wale waliotuweka katika vifungo hivi. Tusipotoa msamaha huu, kwa moyo wa dhati, hatua zinazofuata za kutuweka huru hazitatimilika. Kama tumeshindwa kusamehe ni lazima tuungame dhambi hiyo kwa Bwana na hapo ndipo tutakapopata msamaha wake.

• - 6:1-11 **Alikuwa akijitahidi** sana kwa nguvu zake kuyafanya maisha yawe mazuri, lakini aliishia kushindwa tu, kujiona hafai na kukosa matumaini. Alikuwa akijificha chini ya ardhi katika pipa lake kubwa la divai ili kuwaepuka Wamidiani waliokuwa wakija kwa wingi kuiba mazao na mifugo. Yeye na watu wake walijitahidi sana lakini hawakuweza kuwashinda maadui. Midiani walikuwa maadui walioyapiga malisho ya Bwana na kuiba mbegu. **Kwa njia hiyo hiyo, wamidiani wa leo, mapepo, huliiba Neno la Mungu ili kutuzuia tusizae matunda.** Hebu angalia, walingojea mpaka pale Wana wa Israeli walipopanda mbegu, ndipo walipokuja kuyavamia mazao na kuyaharibu. Walikuja kama nzige, na Wana wa Israeli wakawa maskini sana.

• - 6:8 **Mungu akasema na wana wa Israeli.** Kwa rehemu yake, Mungu alisikia kilio cha wana wa Israeli, akamtuma nabii. Rehema zake ni za milele. Nabii akawaambia wana wa Israeli kwamba Mungu ndiye Mungu wao, alikuwa amekwishawatoa katika vifungo au utumwa lakini sababu iliyowafanya wawe katika utumwa tena (safari hii katika Nchi yao ya Ahadi) **ni kwamba hawakuitii sauti ya Mungu (Neno la Mungu).** TUSIPOISHI kwa kulifuata Neno la Mungu kila siku, ni hakika tutakuwa watumwa na wafungwa wa maadui zetu. Hakuna njia nyingine.

• - 6:12 **Mungu akasema na Gideoni.** Malaika wa Bwana, mwakilishi binafsi wa Mungu, akaja kwa Gideoni. Inawezekana Yesu alijitokeza kwa njia hii wakati wa Agano la Kale. Alimwita Gideoni “Shujaa”. Kwa nini alimwita shujaa mtu aliyekuwa akiishi kama mwoga, mtu ambaye hakujistahi, aliyekuwa akipura ngano kwa

kujificha ili kwamba maadui zake wasimuone? Siku zote Mungu hushughulika na sisi kwa njia hii; huona jinsi tutakavyokuwa. Huyataja yale yasiyokuwako kana kwamba yamekuwako (Rum 4:17). Haangalii jinsi tulivyo, bali jinsi tunavyoweza kuwa katika yeye. Haya ni maneno ya imani yanayoongea.

- - 6:13 **Gideoni alikuwa mwaminifu mbele za Mungu.** Alimwambia jinsi alivyojisikia; “ikiwa Bwana yu pamoja nasi, mbona mambo haya yote yametupata? Watu wengi huuliza maswali haya. Kama Mungu ni upendo, kwa nini watu wema wanateseka? Kama nimekuwa nikimtumikia Mungu, kwa nini basi ninapita katika wakati huu mgumu sasa?” Alimuuliza Mungu “yako wapi matendo yake ya ajabu, waliyotuhadithia baba zetu, wakisema, Je, siye Bwana, aliyetuleta huku kutoka Misri? Ila sasa ametutupa, naye ametulia katika mikono ya Midiani.” Alijisikia kana kwamba Mungu amemwacha.

- - 6:18-21 **Mungu alijifunua mwenyewe kwa Gideoni kama Mungu afanyaye agano.** Alimuonyesha Gideoni jinsi yeye Mungu alivyo; alimuonyesha pia Gideoni nafasi yake halisi kama mshiriki wa agano pamoja na Mungu. Mara nyingi sana Mungu hujibu maswali yetu kwa ufunuo wa jinsi Yeye alivyo!

- **Gideoni alimletea Mungu vitu vilivyo bora. Gideoni aliubeba msalaba wake mwenyewe.** Gharama ya mbuzi na mkate uliookwa nyumbani ambao Gideoni alileta ilikuwa kubwa kupita kiasi kwa mtu aliyekuwa katika mazingira ya kimaskini. Sio hilo tu, Gideoni alipika supu!

- **Gideoni aliona msalaba wa Yesu.** Ingeweza tu kuwa unga wenye gharama, lakini Mungu aliugeza ukawa unga wa agano. Katika kitabu cha Mambo ya Walawi 2:1 sadaka ya mnyama au unga ilipaswa kuteketezwa madhabahuni na kuhani. Kitendo cha Malaika wa Bwana kuiteketeza sadaka ya Gideoni kwa ncha ya fimbo yake kilikuwa ishara ya agano. Ninaamini kwamba katika fikra za Kiebrania za Gideoni, siku hiyo aliona agano la damu kati yake na Mungu. Alimuona Mungu akibadilishana naye uwezo, jina na mazingira.

- **Agano la Damu hubadilisha familia yako, jina lako, na urithi wako.** Gideoni alipata jina la Mungu, na Mungu alipata jina la Gideoni. Shujaa: lilikuwa jina la Bwana, mtu dhai fu aliyeshindwa: lilikuwa jina la Gideoni. Walibadilishana.

- - 6:22 **Katika hali bora zaidi Gideoni aliweza kumsikia Mungu akinena.** Hii ilikuwa tabia kuu ya Gideoni. Alitumia muda mwingi kujenga uhusiano na Mungu na akaendelea kumsikia Mungu akinena.

- - 6:23-24 **Alikuwa na amani ya Mungu kwa sababu ya Msalaba. (Yehova-Shalomu).**

- - 6:25-32 **Ilimbidi Gideoni abomoe sanamu za kifamilia.** Baada ya kupata uzoefu wa msalaba wa Yesu tunahitaji kuziangusha madhabahu. Hali ya kuabudu sanamu imejengwa juu ya kitu kimoja tu: KUJIPENDA. Hii hufanyika mara nyingi zaidi ya kuchukua msalaba wetu. Sanamu haziko wazi sana siku hizi kama ilivyokuwa nyakati za Agano la Kale. Sanamu ni kitu chochote kinachokufanya uenende kimwili badala ya kiroho. Kipimo sahihi zaidi ni nini au ni nani unayemwabudu? Kipimo sahihi zaidi kwa ibada ni nani unayemtii: Fikira zako, mwili wako, mtu mwingine au Roho wa Mungu na Neno la Mungu? Kuenenda katika mwili ni kutii mwili wako (tamaa za asili) na kuenenda kwa Roho ni kumtii Roho Mtakatifu na Neno la Mungu. Ili mtu aweze kubomoa sanamu inabidi alishike Neno la Mungu na kuwa na ushirika na Roho Mtakatifu; kwa njia hiyo ataweza kuacha kutii tamaa zake za asili.

- **Kwa mfano katika Warumi 12:1** baada ya Mungu kutuonyesha rehema tulipokuwa tumepotea, na tena baada ya kuutoa msalaba na neema yote katika Warumi sura ya 1 hadi ya 11, alisema "...nawasihi, kwa huruma zake Mungu, itoeni miili yenu iwe dhabihu iliyo hai..." Kwa maneno mengine, bomoa miungu yako kama Gideoni alivyofanya. Vitoe viungo vyako vyote kwa Mungu, mpe mwili wako uwe chombo cha udongo kilichojazwa na Mungu kama Adamu alivyopaswa kuwa. Uwe tayari kuwa "tofauti" kwa ajili ya Mungu, usiifuatishe namna ya dunia hii.

- - 6:34 **Baada ya kubomoa sanamu, Gideoni alijaa Roho wa Mungu.** Akawa na nguvu ya Mungu. Gideoni alikuwa na nguvu ya kumtii Mungu na kuacha kutii fikra zake na mazingira ya asili katika maisha yake. Kitu cha kwanza kilichotokea ni kwamba adui alishambulia. Kwa kawaida, tunapobomoa sanamu za kiroho, tunaweza kutazamia kuona vita.

- - 6:36-40 **Alijifunza kuwa na ushirika na Mungu kwa kiwango imara** cha imani bila kujali hali ya mazingira (labda pia kwa sababu ya mazingira).

- **Gideoni alizaa matunda kwa ajili ya ufalme wa Mungu. Akawa mmojawapo wa wakombozi wakubwa wa watu wa Mungu katika historia.** Soma Waamuzi 7 hadi 8:21 utapata habari za vita. Mungu akamgeuza mtu aliyeshindwa, aliyeishi katika mazingira yasiyo na matumaini kuwa mshindi mkubwa katika historia kwa sababu ya mambo mawili: 1) Msalaba, na 2) Hali ya Gideoni ya kuuthamini

msalaba kiasi cha kuwa tayari kwenda vitani kwa ajili ya Mungu na kumfanya Mungu kuwa kiini cha maisha yake yote, sio tu kumpa nafasi ya kwanza au ya pili; na ushirikiano wa Gideoni katika kubomoa au kuangusha sanamu na ngome.

Ingawa Gideoni alikuwa akitawaliwa na dhambi za ukoo, laana na hali ya kuabudu sanamu, Malaika wa Bwana alileta Msalaba katika eneo lile pamoja na dhabihu, akasema, "Kijana mwanamume, hakuna njia nyingine, isipokuwa kukuondolea laana na dhambi zako. Kwa sababu ya agano hili, ninakuondolea dhambi zako, laana za ukoo wako, dhambi za vizazi vyako ulizorithi na matokeo ya kuabudu sanamu, yaliosababishwa na wewe na mababu zako. Nitalifuta jina lako 'lililolaaniwa na Mungu' na utaitwa kwa Jina langu, Shujaa."

Gideoni akakutana na Mungu pale pale alipokuwa. Mungu hakutaka Gideoni ajifanye kuwa mtu wa aina fulani wakati hayuko hivyo. Lakini Mungu alikuwa na imani naye. Gideoni alijifunza kwamba huwezi kupata ushindi kwa nguvu zako mwenyewe bali kwa kuzaa **MATUNDA**. Alijifunza kwamba alikuwa **MFUNGWA KATIKA NCHI YA AHADI**. Alijifunza jinsi ya kuwa rafiki wa Mungu (**MTO UTIRIRIKAO**), alijifunza **MUNGU NI NANI**. Alijifunza pia **KUKETI, KUENENDA na KUPINGA**. Na matokeo ya mwisho ni matunda kwa ajili ya ufalme wa Mungu.